

SESOTHO Heart Book
Cell phone format

PELO EA MOTHO



COPYRIGHT

ISBN 0 908412 57 6

E-MAIL: info@angp.co.za

**ALL NATIONS GOSPEL PUBLISHERS
P.O. BOX 2191, PRETORIA, 0001, R.S.A.**

**(A Gospel Literature Mission financed by donations)
(Reg. No. 1961/001798/08)**

PELO EA MOTHO

Ka J.R. Gschwend

Pelo ea motho ke tempele ea Molimo kapa ntlo eo satane a sebeletsang ho eona. 1 Johanne 3:4-10.

Buka ena ha se bukana e ncha, e hlahile lefatšeng la Fora (France) pele ka lilemo tse fetang 200 tse fetileng. E tliselitse batho ba likete kete leseli le lehlohonolo. E sebelitse joale-ka seipone sa moea, moo banna le basali ba bonang boemo ba bona ba moea joale ka ha Molimo o bo bona. Ba bangata ba bone lipelo tsa bona tse tletseng sebe, 'me ka baka leo ba sokoloha, 'me ba fumana pelo tse ncha le moea o mocha ka ho bona.

Ha u bala buka ena, hopola hle hore ke seipone sa pelo, ha u e bala ua ipona. Leha eba u mohedene, kapa mokreste, kapa mokoenehi, u tla bona setšoantšo sa hao joaleka ha Molimo O u bona. Molimo ha O ee ka tšobotsi ea batho. O talima pelo ea motho, e seng sefahleho, kapa 'mala leha e le letlalo la motho.

Satane ke ntat'a bohle ba leshano. Ke morena oa lefifi, le molimo oa lefatše. O iphetola lengeloi la leseli, athe ha e sale lengeloi la leseli. Ba bangata haholo ba rata ho mo nka setšoantšo ka mehopolo ea bona, empa ba khopisoe ke ha satane a iponahatsa ka sebopelo seo e leng sa hae sa 'nete.

Joaleka ha ho bile mehleng ea khale, le kajeno ho ntse ho le joalo, ho na le baapostola ba bohata ba bangata, ba sebetsang mano, ba ikhakanya ka sebopelo se kang sa baapostola ba Krete, 'me ha se ho ka makatsang, etsoe Satane le eena a ikhakanya ka sebopelo se kang sa lengeloi la leseli. 2 Ba-Kor. 11:13-14. Satane o fofatsa mahlo le likelello tsa batho hore ba se ke ba bona lerato la Molimo, le khanya ea 'ona, le boholo ba 'ona, le hore ba se ke ba bona Molopolli oa bona, e leng Jesu Krete. 2 Ba-Kor. 4:4. Batho ba fofalitsoeng ke molimo oa lefatše lena ha ba bone hore ba mathela, tšenyehong e sa feleng, lihelong tsa sa feleng, tse tukang mollo le sebaole, ba sa elleloe letho. Ba shoele ka ngeng ea

Molimo, 'me ba busoa ke moea oa molimo oa lefatše lena. Ba-Efese 2:2. "Lebaka leo Mora oa Molimo a hlahleng ka lona ke hore a felise mesebetsi ea Diabolose." 1 Johanne 3:8 "Ka baka leo ipeeng ka tiaso ho Molimo, le hanele Diabolose, 'me o tla le balehela. Atamelang Molimo, 'me o tla le atamela." Jakobo 4:7-8.

Ha u bala buka ena, 'me u talima litšoantšo tsena tsa eona, u tla be u talima ka pelong ea hao. Lumela hore pelo ea hao e batlisisoe 'me u bone boemo ba oena. Ha u fumana hore pelo ea hao e mpe e tletse sebe, u se ke ua latola leha e le ho e pata, empa lumela, 'me o ipolele libe tsa hao. "Ha re re ha re na sebe, rea ithetsa, 'me ha ho 'nete ho rona. Ha re ipolela libe tsa rona, Molimo oa tšepaha, o lokile hore o re tšoarele libe, 'me o re hlatsoe bokhopo bohle. Ha re bolela hore ha re na sebe re o etsa leshano, 'me lentsoe la Oona ha le eo ho rona." 1 Johanne 1:8-10.

Ikokobetseng ka tlas'a letsoho le matla la Molimo hore O le tšoarele libe, 'me O le hlatsoe ka mali a bohlokoa a Jesu Kreste.

U busoa ke Molimo kapa Satane. U lekhoba la sebe kapa u mohlanka oa Molimo. Haeba sebe se busa bophelo ba hao, u se ke ua latola, u mpe u hoeletse ho Molimo o tla u lokolla ka Jesu Kreste, ea tlleng lefatšeng ho tla pholosa baetsalibe, le ho tla tutubolla mahlo a lifofu, ho tla re ntša lefifing, le ho ntša lefifi ka ho rona. O tllile ho re kenya leseling la Hae le makatsang. Jesu o tllile ho re lokolla matleng a sebe le a satane. Ka Eena re lopotsoe libeng tsa rona. U eme pel'a Molimo o halaalelang oo bonang, o tsebang liphiri tsohle-tsohle tsa hao, le liketso tsohle tsa hao tse patiloeng, 'moho le mehopolo eohle ea hao. U ke ke ua ipatela Molimo le liketso tsa hao u ke ke ua li pata pel'a Oona.

“Ea hlomileng tsebe, na a ke ke a utloa na? Ea bopileng leihlo na a ke ke a bona na?” Pes. 94:9.

“Hobane mahlo a oona a talimile mekhoha ea batho bohle, 'me 'o bona metsamao ea bona kaofela. Ha ho lefifi ha ho moriti o motšo, moo ba sebetsang bokhopo ba ka ipatang teng.”

“Ruri mahlo a Jehova a qamaka lefatšeng lohle, hore a emele bao pelo tsa bona e leng tsa hae kaofela.” 2 Likron 16:9, Johanne 2:24.

“Ho lehlohonolo eo tšito ea hae e tšoaretsong, eo sebe sa hae se apesitsoeng. Ho lehlohonolo motho eo Jehova a sa 'malleng bokhopo ba hae, eo thetso e leng sieo pelong ea hae”. Pes. 32:1-5, Bala hape Pes. 51.

Jesu o sa bitsa le kajeno: “Tlong ho 'na lona bohle ba khathetseng, ba imeloang, 'me ke le fa phomolo.” Matt. 11:28.

1. PELO YA MOETSADIBE



Setšoantšo sena se senola pelo ea
mohetene, eo moetsalibe, ea molefatše, ea


monna kapa mosali ea sa tsoaloang la bobeli, ea busoang ke moea oa lefatše lena, ea busoang ke litakatso le ke mehopolo ea nama.

Sena ke seipone sa 'nete sa pelo ea hae, kamoo Molimo O e bonang kateng. Mahlo a hae a chesang, a mafubelu a bolela botahoa. Bala Liproverbia 23:29-32.

"Bomalimabe ke ba mang na? ... Ke a mang mahlo a mafubelu na? Ke a ba genehelang ho noa, ba hlanyetsang veine e tsoakiloeng. U se ke ua talima veine ha e le khubelu ha e phophoma lefisoaneng, leha e thehela hamonate 'metsong. Ho felleng e loma joaleka noha, e hlaba joaleka marabe. Mahlo a hao a tla talima liraburabu, 'me pelo ea hao e tla bolela tse khopo."

Tlas'a hloho u bona pelo ea motho e nang le liphoofole tse sa tšoaneng, tse tšoantšang libe tse sa tšoaneng ka pelong ea motho, e leng ntlo ea tsona. Pelo ke ntlo ea libe tsa rona. Molimo o re, "Pelo e mano ho fetisa tsohle e bolile hampe, e ka tsejoa ke mang." Jeremia 17:9. Jesu

ka bo-Eena O re: "Hobane ka hare pelong tsa batho, ke moo ho tsoang mehopolo e mebe, le mafebe le lipoko, le lipolao le likutso, le takatso ea leruo, le lonya le thetso, le bohlola, le mahlo a talimang hampe, le linyefolo le boikhohomoso, le bohlanya. Manyala ao 'ohle a tsoa kahare." Mareka 7:21-23.



PIKOKO:

Sebopuo sa pele ke Pikoko. Ke nonyana e ntlehali, e masiba a matle a mebala-bala, 'me mona e tšoantša sebe sa boikhohomoso. Lucifera, kerubime (lengelo) le tlotsitsoeng, ka nako e 'ngoe e bile mojari oa leseli la Molimo, lengelo la Molimo la lihuoa ke sebe sa boikhohomoso, 'me la fetcha sera sa Molimo, Diabolose. Esaia 14:9-17. Diabolose ke lengelo la lefifi, 'me ha e sa le lengelo la leseli.

Boikhohomoso bo iponahatsa ka litsela tse ngata. Ba bang ba ikhohomosa ka maruo a bona, a likhomo, linku, matlo, masimo, kapa liaparo tsa bona tsa chelete e ngata, ka lifahleho tse ntle, ka 'mele ea bona e metle, eo ba e bontšang ka litsela tse hlabisang lihlong. Ba bang ba nka boikhohomoso ba hoba sechaba se itseng, ba bang ka 'mala oa letlalo la bona, le ka lintho tse ling tse itseng tsa lefeela. Ba bang ba leka ho iketsa botle ka mekhabo e roaloang matsohong, ka masale, ka ho iketsa litšoantšo Lifahlelong le 'meleng ka lehare, empa Molimo o ntse ba entse botle bo phethehileng.

“Molimo o hanela boikhohomoso, empa o hauhela ba ikokobetsang.” 1 Pet. 5:5.

“Boikhohomoso bo etella timelo pele, boikhantšo bo isa ho oeng.” Liproverbia 16:18.



NTJA:

Ntja e tšoantša litakatso tsa nama, boitšoaro bo bobe, bofebe le bohlola. Ka hohle moo ntja e eang teng ea itšilafatsa. Batho ba bangata ba tšoana le ntja, ka hohle moo ba eang ba qala ho etsa marato a lefeela, mecheliete le linyatsi. Banna ba etsa le banna ba bang. Bofebe le bohlola li atile haholo hona mehleng ena e mebe ea bofelo. Batho ba bacha ba sitoa ho itšoara, banna le basali ba nyetsoeng ba sitoa ho itšoara, le bahlolohali ba bangata ba phela sebeng sa ho feba. Sebe sa Sodoma se kene bophelong ba batho ba likete-kete. Ho phethahala mantsoe ao Jesu a a boletseng pele a re: Mehla ea bofelo e tla tšoana le mehla ea Sodoma le Gomorrha. Mazulu le Basotho, le mefuta e meng ba re motho ea itšoarang hampe kapa ea febang

o tšoana le ntja. Motho ea joale a ke ke a rua 'Muso oa Molimo, hobane "kantle ho tla sala lintja le bafebi, le baloi, le babolai, le ba rapelang melimo ea bohata, le bohle ba ratang leshano, le ba le etsang" Tšenolo 22:15. Ka baka leo, "Tšabang bofebe. Sebe se seng le se seng se ka etsoang ke motho, se kantle ho 'mele oa hae, empa ea febang o siteloa 'mele oa hae. Ana ha le tsebe hobane 'mele ea lona ke tempele ea Molimo. Ekare ho monna kapa mosali a senya ('mele oa hae) tempele ea Molimo, Molimo o tla mo senya, hobane tempele ea Molimo ea halalela 'me tempele eo ke lona." 1 Ba-Korinthe 3:16-17; 6:15-20.



KOLOBE:

Kolobe e tšoantša sebe sa botahoa, le meharo. Kolobe e ja ntho tsohle tseo e li

fumanang. Ha e khethe tse ntle kapa tse mpe, joale ka batho ba bang ba jang nama ea liphoofole tse ichoeletseng ke ho kula kapa tse fenethiloeng. Ba ja mali, litoeba ka mefuta ea tsona le tse ling tse joalo, tseo Molimo o reng re se ke ra li ja. Lik. 15:20; Esaia 66:3-7. Ho feta mona ba silafatsa 'mele ea bona e leng tempele ea Molimo ka ho ja koea ka lehano, le ka ho e tsuba ka linko kapa ka ho tsuba koea ena e silafetseng ka peipi kapa matekoane a silafatsang, a kenyang chefo maling a bona, a ba hulelang mekhoeng e tšabehang ea boetsalibe. Satane o ba tlamile ka takatso ea ho tsuba, 'me ke ka matla a Molimo feela motho ofe kapa ofe a ka lokolloang, litšileng tsena le mekhoeng ena e hlompolang motho. Batho ba bacha le ba holileng, ha ba nahane letho ka ntle ho lino tse tahang, tse kang joala, veine le joala ba Sekhooa (brandy). Leha ho le joala, ha ho letahoa le tla rua 'Muso oa Molimo. Joala ha se lijo ke seno se bolaeang, se ferekanyang, se senyang kelello, hoo ba bo noang ba etsang liketso

tse kang tsa mahlanya. Ba lahlehelo a ke mekhoa e metle ba loana, ba bolaeana, e leng ntho ea ba neng ba ke ke ba e etsa ha ba sa noa joala. "Veine ke mosomi, joala bo lerata bohle ba khelosoang ke tsona ha ba na bohlale." Liprov. 20:1.

Molaong oa Moshe ha motho a ne a e-na le mora ea ikhantšang ea tahoang o ne a tlepetsoa ka majoe a shoe. Deut. 21:19-21. Ba ritelang joala kapa lino tse tahang, ba molato o tšoanang le oa bao ba bo etsetsang ho rekisa le ho bo noa. Esaia 5:22. Hobane lentsoe la Molimo le re, "Ho malimabe ea nosang oa habo, uena ea tsoakanyetsang ba bang seno sa khalefo ea hao, u bile u ba tahisa." Hab. 2:15. Leting hammoho le hopose, ke linokana tse isang nokeng e kholo.

"Le se ke la lahleha, ha e le ba litšila, le ba rapelang litšoantšo, le ba boki, le bafebi, le ba sodoma, le masholu, le ba lakatsang leruo, le matahoa, le ba sebang ba bang, le ba utsoang, ba joalo ba ke ke ba rua 'Muso oa Molimo.'" 1 Ba-Korinthe 6:9,10.

“Me mesebetsi ea nama e pepeneneng ke ho feba, le ho boka, ke bonyala le bootsoa, ke ho rapela melimo ea bohata, le boloi le hloeano, le likomang le mano le bohale, le likhang, le liphapang, le likhaohano le mohono, lipolao le botahoa le meharo Ba etsang tse joalo ba ke ke ba rua ‘Muso oa Molimo.” Ba-Galata 5:19-21.

“Le se ke la taho ke veine (joala) hobane bohloa bo teng ho eona le mpe le tla le moea.” Ba-Efese 5:18. Jesu, seliba sa bophelo o mema ba nyoriloeng ho tla ho Eena, o re: “Ekare ha e mong a nyoriloe, a tle ho ‘na, a noe feela metsi a bophelo.” Johanne 7:37-39. “Helang! lona kaofela ba nyoriloeng, tlong metsing le lona bao le se nang chelete, tlong, ithekeleng, ‘me le je. Tlong, le ithekele veine le lebese le se na chelete, le se na ho reka. Na le ntšetsa ke’ng seo e seng lijo (seo e seng bohobe) chelete, le ikhathaletsa ke’ng se sa khoriseng.” Esaia 55:1-2.



KHULU: (Sekolopata)

Kulu e bolela sebe sa botsoa, sa tieho, le sa boloi. Ho se lumele ke sebe sa boloi. Ea botsoa o oela melekong e mengata. A ka mpa a utsoa bakeng sa ho sebetsa, sebe sena kamehla se hulela motho ho bolaeeng. Ho ba botsoa moeeng ho re sitisa ho rapela, leha e le ho bala Bibe, ka ho ea kerekeng, ho re sitisa ho batlisisa Lentsoe la Molimo, leo re fumanang bophelo bo sa feleng ho lona. Tleho ke lesholu la nako, 'me qetellong e hulela motho tšenyeng. Ha Molimo O buile le uena hore u neelane ka pelo ea hao ho Oona kajeno kapele-pele Diabolose o u bolella hore u se ke ua ineela kajeno, u tla ineela ho Molimo hosasane, kapa ka nako e 'ngoe, eo mohlomong u ke keng ua hlola u e fumana. Ka mehla u

tla 'ne u re hosasane, e seng kajeno. Lilemo li 'ne li fete u e-so ineele ho Molimo ho fihlela lefu le u fihlela u sa itokisa, 'me u shoe u se na Molimo u sa pholoso, u se na Krete. Ka baka leo, Molimo o re: "Kajeno ha le utloa lentsoe la oona, le se ke la thatafatsa lipelo tsa lona." Ba-Heberu 3:7-8.

Khaketla ea khulu hangata e sebelisoa ke lingaka tse loelang, ka baka leo, e bolela sebe sa ho tšepa tšebeliso ea boloi bakeng sa ho hoeletsa ho Molimo o phelang nakong ea mahlomola le mafu, batho ba bea tšepo ea bona melimong ea litšoantšo, methapong ea limela, majoeng a itseng, litaola, manakeng, le linthong tse shoeleng tse boleloang ke ngaka e loelang. Ha ba tšoanetse ho lumela ho 'Mopi oa bona le Molopolli oa bona. Molimo o laetse bana ba Iseraele, oa re, "U se ke ua tlohela moloi a phela." Exoda 22:18..

"Ho se ke ha fumanoa haeno motho ea fetisang mora oa hae, kapa morali oa hae mollong, leha e le mophofi ea phofang, kapa selaolio se laolang, kapa senohe, kapa moloi, le moupelli, leha e le ea botsang

balimo le ngaka e reng ea profeta, leha e le ba botsang bafu, hobane bohle ba etsang taba tseo ba manyala ho Jehova." Deut 18:10-12. "Le se ke la khelohela ho ba bitsang bafu, leha e le ho linohe, le se ke la botsa litaba ho bona, le tle le se ke la itšla litšila ka bona." Levitike 19:31. "Ha motho a khelohela ho ba bitsang bafu, motho eo ke tla mo tjamela ke mo tlose har'a sechaba sa habo. Le ikhalaletse ke hona, le be le khethehe, hobane ke 'na Jehova Molimo oa lona." Lev. 20:6-7. Jesu Krete ke eena feela mofolisi oa 'mele, pelo le moea. Ke eena ea tšoareleng makhopo 'ohle a rona, ea folisang maloetse a rona kaofela. Pesaleme 103:1-3.

"E mong har'a lona ha a baba, a bitse baholo ba kereke (e seng ngaka) ba mo rapelle ... 'me thapelo e entsoeng ka tumelo e tla mo tsosa liphateng, 'me ha a entse libe, o tla tšoarelola tsona. Bolellanang litšito tsa lona, 'me le rapellane, le tle le fole." Jakobo 5:14-16; Tšenolo 22:15.

Ha u bala bukana ena, Molimo O bua le uena, O u bolella hore u bakele libe tsa Hao, 'me u ineele ho oona ka bophelo ba hao, empa moea oa khulu o ka ho uena oa u nyenyeletsa, o re: "U se ke ua tata, u se ke ua ineela kajeno, mohlomong u tla ineela hosasane, apa bekeng e tlang kapa lemong se tlang, a k'u tsebise monna oa hao pele, a k'u botse mosali oa hao kapa ntat'ao u utloe hore na bona ba reng, nyala pele, 'me u bolotse bana ba hao pele. Bakeng sa hore u utloe lentsoe la Molimo, u sekehela tsebe ea hao lentsoe le thetsang la Diabolose. Ka ho etsa joalo, u thatafatsa pelo ea hao ho fihlela e tla ba thata ho fetisa khaketla ea khulu.



NKOE: (Lengau)

Ena ke phofoolo e tšabehang e nyoretsoeng mali, e tšoantšang sebe sa khalefo, bohale bo tšabehang, khalefo e ka pelong ea motho. Ea busoang ke khalefo kapa ke moea oa bohale, o tla mo hulela liketsong tse sehloho o tla rohakana a hlapaole, 'me o tla ba kotsing ea ho bolaea motho. Hangata, motho ha a e-noa joala eka o noa moea oa Diabolose, hore a tle sitoe ho itšoara. Ba bangata ba noa joala naholo hore ba tle ba be sebete sa ho iphetetsa. "Veine ea bona ke mahloko a lidrakone, ke mahloko a bolaeang a qooane." Deut. 32:33. Boiphetetso bo monate pelong ea boetsalibe, empa Molimo ke oona mophetetsi. Jesu o re: "Ratang lira tsa lona." Molimo o tšepisitse ho re tšoarela melato eo rona ha feela re tšoarela ba re sitetsoeng.



NOHA:

Sebopuoana sena se kileng sa e-ba setle sa thetsa Adama le Eva serapeng sa Edene, hore se senye kopano e monate ea bona le Molimo. Satane o ile a tlala mōana ha a bona kamoo Molimo O nong O rata monna oa pele le mosali oa hae, kamoo O nong o ba beile hore e be babusi, ba lefatše lohle sebakeng sa Lucifere e leng Diabolose. Ka mōana Satane o ile a etsa morero oa ho senya kopano e makatsang eo motho a bileng le eona le Molimo, a senya le bophelo boo motho a bileng le bona ba Molimo. Mōana o tšoanang, o sehloho, o teng ka pelong ea hao le bophelong, 'me teng o senya thabo ea hao, ha ba bang ba thabile 'me ba phela hamonate. Le ba-Kreste ba sebetsang ba lokela ho falimehela moea ona oa mōana oa Diabolose. Ha Molimo o sebelisa, o hlohonolofatsa mohlanka e mong oa oona ho feta uena, mōana o se o kenya mehopolo e mengata e mebe ka pelong ea hao hore u tle u bone u loee ba bang, hore u senye thabo ea bona, 'me u ba bolae ka baka la mōana. Poulelo lipakeng tsa

monna le mosali e ka senya lehae la bona le bophelo ba bona bohle.

"Poulelo e thata joale ka ngalo ea bafu."
Selefa sa Lifela 8:6.



SEHOHOANA:

Sehohoana se ja mobu se tšoantša sebe sa bokhonatha, le lerato la chelete le lerato la leruo, motso oa libe tsohle. 1 Tim. 6:10. He kile ha bonoa lihohoana tse itseng mane Congo li ntse li e-ja bohloa, tsa bo ja ho fihlela li phatloha limpa, li e-shoa. Motho ea lekhonatha ha a rate ho arola ntho tsa hae leha e le ho fa mafutsana le ba hlokang. O leka ka litsela tsohle tsa ho tšepahala le tsa ho se tšepahale ho bokella le ho iphumanela maruo a lefatše lena, ao ka mora teng a tlang ho jeoa ke tšoele le mafome, athe

Jesu o itse, re bokelle matlotlo a rona leholimong, moo tšoele le mafome li sa jeng teng, le moo ho seng masholu a utsoang; hobane moo letlotlo la hao le leng teng, ke moop pelo ea hao e tla ba teng. Matt. 6:19-21, Joshua 7, Liketso 12:16-21. Akane le ba ntlo ea hae ba ile ba timela hobane o ne a rata gauda le selivera, le liaparo tsa chelete e ngata, 'me a inkela tse rohakiloeng. Josh. 7. Judase Iskariota, morutua oa Jesu o ile a timela hobane o ratile chelete ho feta Jesu. Matt. 27:3-10.



SATANE:

Eena ke ntat'a bohle ba leshano, le ba le etsang. Ke eena molisa oa 'nete oa liphoofole tsena, le 'musi oa pelo. Jesu o itse, "Lona le tsoa ho ntat'a lona e leng Diabolose, 'me le rata ho phetha litakatso

tša ntat'a lona. Eena ke 'molai e sa le ho qaleng, ha a lule 'neteng. Ha a bolela leshano o ipuella tša hae, hobane ke eena ea leshano, le ntate oa leshano." Johanne 8:38.

Ke eena ea leshano le ntat'a ba leshano ka baka leo re tšabe leshano kahobane ba ratang leshano le ba le etsang ba tla ba kante hammoho le lintja, bafebi le baloi. Tsenolo 22:15.

Ea etsang sebe ke oa Diabolose, ke ka baka leo Mor'a Molimo A hlahileng, ho tla felisa mesebetsi ea Diabolose. Johanne 8:44.



NALELI:

Naleli e tšoantša letsoalo le leng teng pelong ea motho e mong le e mong. Letsoalo ke tsebo ea botle le bobbe. Ba-

Roma 2:15, 9:1; 1 Tim. 4:1-2; Tite 1:15;
Ba-Heberu 10:22.

Mona letsoalo le silafalitsoe, le letšo, le lebe. Le bolailoe ke ho etsa sebe kamehla, le foufetse, le senyehile. Le ke ke la ikahlola liketsong tsa lona. Le ka hloekisoa ke mali a Jesu feela.

Ba-Heberu 9:14.



LEIHLO:

Leihlo la Molimo le bona ntho tsohle tse ka pelong. Ha ho letho le ka patehang leihlong le tukang la Molimo. Ka baka leo, oa tseba, 'me O bona mehopolo eohle e patehileng, o tseba le boikemisetso ba pelo. Leha u ka etsa liketso tsa hao tse mpe har'a lefifi le letšo la bosiu, har'a moru o teteenaneng haholo, ka har'a lengope

le tebileng, kapa kae kapa kae Molimo oa bena hohle.



LENGELOI:

Lengelo le eme sebakeng sa lentsoe la Molimo. Molimo o bua le moetsalibe ea thetsitsoeng, o 'molella hore a bake, 'me a lese leseli la oona le kene pelong ea hae e ntšofetseng. Molimo o buisana le uena mobali ea ratehang ka bukana ena.



LEEBA:

Nonyana ena e hloekileng, e bonolo, e se nang mano, e tšoantša Moea o Halalelang. Moea oa 'nete, o kholisang moetsalibe hore sebe se teng, le ho loka, le kahlolo. Setšoantšong sena Moea o Halalelang o kantle ho pelo, hobane o ke ke oa lula moo sebe se leng teng, se busang teng.



MALEMENYANA A MOLLO:


Malemenyana ana a mollo a potileng pelo ea moetsalibe, a tšoantša lerato la Molimo le potileng pelo e tletseng libe, Molimo ha o khahloe ke lefu la moetsalibe, empa o batla hore moetsalibe a bake, 'me a phele. Jesu o tlike ho re a pholose moetsalibe. Thabo e kholo e teng leholimong ka baka la moetsalibe a le

mong ea bakang. Molimo o rata ho hloekisa pelo ea moetsalibe ka mali a Mora oa oona ea tsoetsoeng a 'notsi e leng Jesus Krete. Malemenyana ana a mollo e tšoantša mali a Konyana ea Molimo e tlosang libe tsa lefatše. Lerato la Molimo le batla ho kena ka pelong e batang, e shoeleng.

Haeba setšoantšo sena se joale ke pelo ea hao hantle, hoeletsa ho Molimo o u bulele pelo ea hao, 'me u lese leseli la lentsoe la oona le khanye ka har'a pelo ea hao. Lumela ho Morena Jesu Krete, 'me u tla bolokeha. Molimo o tšepisitse ho u fa pelo e ncha, le ho kenya Moea o mocha ka ho uena, ha u kopa hore o etse joalo. Hona ho bontšoa setšoantšong se latelang.

Ha re re, ha re na sebe, rea ithetsa, 'me 'nete ha e eo ho rona. Ha re ipolela libe tsa rona, Molimo Oa tšepaha, O lokile, hore O re tšoarele libe, 'me o re hlatsoe bokhopo bohle. 1 Johanne 1:8,10.

2. PELO E IPONANG MOLATO E INEELANG



2

Ke setšoantšo sa motho ea qalang ho baka. Lengeloi le tšoere sabole, e leng lentsoe la Molimo o phelang, le matla, le fetisisang ka bohale lisabole tsohle tse leolitsoeng ka 'nga tse peli 'me le ea hlaba, le eo kena le likhaohanong tsa pelo le tsa moea. A hopola hore moputso oa sebe ke lefu. Ba-Roma 6:23. Le hore kabelo ea baetsalibe e tla ba teng letšeng la Mollo le tukang le sebabole. Lengeloi le tšoere lehata letsohong le leng. Le mo hopotsa lefu la hae, le hore nama eo ea hae, eo a ratang ho e khabisa, ka ho e kholisa takatsong tsa eona, e tla shoa, e tla jeoa ke liboko, 'me moea oa hae o tla hlaha pel'a setulo sa kahlolo, sa Molimo. Moea o Halalelang oa qala ho khantša ka hare ho pelo ea hae. Leseli la Molimo la leleka lefifi; le lerato la kena, la futhumatsa pelo ea hae e batang. Moo leseli le kenang teng, lefifi lea tsoa. Joale liphoofole e leng libe, lia baleha. Lumella Jesu, Leseli la lefatše ho kena pelong ea hao, 'me lefifi, le tsa lefifi, li tla tsoa pelong ea hao kamoo u bonang setšoantšong sena. Jesu a re: "Ke

'na leseli la lefatše, ea ntatelang a ke ke a tsamaea lefifing. Johanne 8:12. Ho malimabe ba ratang lefifi ho feta leseli ba bulelang lefatše lipelo tsa bona hore liphoofole tsena li litulo pelong tsa bona. Pelo e tšoantše ho ba tempele ea Molimo. Jesu ha a ne a kena tempeleng Jerusalema; a lelekela ntle bohle ba bapatsang ka likhomo, linku le maeabana; a liha litafole tsa ba ananyang lichelete, le litulo tsa ba bapatsang. A ba bolella hore ba se ke ba fetola ntlo ea thapelo lehaha la masholu. Ntlo eo ke pelo ea hao. Jesu ha a tlela ho re tšoarella libe tsa rona feela. o tlike ho re lokolla ho tsona. Ha Mora a le lokolla e tla ba le lokolotsoe ka sebele. Johannes 8:36

3. PELO E BAKANG



Mona re bona pelo ea moetsalibe ea bakileng ruri oa utloa 'me o bona boholo le ho tšabeha ha libe tsa hae tse ngata, tseo Jesu a thakhisitsoeng ka baka la tsona. Ha a talima sefapano, seo lengeloi, lentsoe la Molimo le mo senolelang sona, pelo ea hae ea hlomoha. Lerato la Molimo le bonahalitsoeng ka Jesu Kreste, le qhibilihisa pelo ea hae, haholo ha a hopola hore Jesu Kreste, Konyana ea Molimo, o tlike ho tlosa libe tsa hae tse ngata, le hore o ratile ho shoa sebakeng sa hae sefapanong. 'Nete ea hore Jesu Kreste o ile a shapuo, a roesoa mofapahloho oa meutloa, a khokhotheloa matsohong le maotong ka lipekere tse sehloho, 'me a fehoa sefapanong ka baka la libe tsa rona, tsena tsohle li soabisitse pelo ea moetsalibe ea bakileng, a bala, a mamela lentsoe la Molimo, 'me o ipona seiponeng seo e leng lentsoe la Molimo 'me o lemoha kamoo pelo ea hae e leng ntšo, le kamoo e tletseng libe kateng. Hona ho hlaba pelo ea hae, 'me pelo ea hae e hlomohileng e robhileng e etsa hore a lie ka baka la libe, 'me Molimo o atamela

haufi le eena. Lerato la Molimo le khotso ea Oona li kena pelong ea hae, e hlatsoitsoeng libe tsohle, ka mali a Jesu Kreste. O qala ho lemoha hore Morena o haufi le ba pelo li robehileng 'me O pholosa ba hlomohileng ba robehileng lipelo. Pes. 34:18. O folisa ba pelo li hlabehileng, O tlamella maqeba a bona. Pes. 147:3. Hape lentsoe la Molimo le re: "Eo ke tla mo talima ke ea hlomohileng ea robehileng pelo, le ea thothometsoang ke lentsoe la ka." Esaia 66:2.

Moea o Halalelang le lerato la Molimo li kena pelong ea hae e hloekisitsoeng ha a sa talimile sefapanong ka tumelo, le maling a Jesu Kreste a tšolohetseng tšoarello ea libe tsa rona. O qala ho lemoha hore libe tsa hae li tšoaretsoe, 'me o fumana 'nete pelong hore mali a Jesu Kreste Mora oa Molimo, a mo hlatsoitse libe tsohle. 1 Johanne 1:7. A lemoha hore ea lumelang ho Jesu, a ke ke a timela, empa o na le bophelo bo sa feleng. Bala 1 Ba-Kor. 6:10-11. Re na le topollo ka mali a Jesu, e leng tšoarello ea litšito ka monono eo mohau oa hae. Ba-Efese 1:7. Ho se ho

le moea o mocha joale pelong ea hae, ho tloha joale ha a sa rata lefatše leha e le ntho tsa lefatše, empa o lakatsa lintho tsa Molimo, O tlatsitseng pelo ea hae ka lerato. Liphoofole tse tšoantšang libe tsa hae, li kante ho pelo ea hae, leha Satane ka bo-eena a sa rate ho tloha, o ntse a talimile morao ka tšepo ea ho fumana sebaka sa ho kena hape. Ka baka leo, re boleletsoe hore re falimehe, 'me re rapele re hanele Diabolose, 'me o tla re balehela.

Copyright ANGP

4. HO THAKGISWA LE KRESTE



4

Setšoantšo sena se re bontša mo-Kreste ea fumaneng khotso e phethehileng le topollo ka sehlabelo sa Morena oa rona le 'Moloki, Jesu Kreste. Ka baka leo, ha a sa ithorisa ka letho ha e se ka sefapano sa Jesu Kreste, eo ka eena lefatše le thakhisitsoeng ka ngeng ea hae, le eena o thakhisitsoe ka ngeng ea lefatše. Ba-Galata 6:14. O lemoha ka ho tla hore Jesu o shoele sefapanong hore le rona re shoe ka ngeng ea sebe "me re phelele ho loka. 1 Pet. 2:24. Mo-Kreste o thakhisitsoe ka ngeng

Ea
hlolang o
tla ja
lefa la
Molimo

'Na ke
ithorisa
ka
sefapano
sa
Morena
Jesu
Kreste

ea lefatše. Re laetsoe hore re tsamaee ka moea, 'me re se ke ra kholisa

litakatso tsa nama. Ba-Gal. 5:12-25. Hape re bolelloa hore re phehelle khalalelo eo ho seng motho ea ka bonang Molimo ha a se na eona. Ba-Heberu 12:14.

Pelong ea mo-Kreste enoa u bona tšiea ea ba ileng ba tlamella Jesu ho eona ka mahlaahlela, ha ba se ba mo hlobolisitse liaparo tsa hae, u bona liphafa, le katse eo ba ileng ba mo shapa ka eona ka sehloho, ka hobane kotlo e neng e loketse rona, e ile ea oela holim'a hae. Esaia 53:11-12 O tetekilo e ka baka la makhopo a rona. Morena Heroda le batho ba hae ba ile ba mo soma eitse hoba ba mo shape, ba mo apesa kobo e khubelu, eare hoba ba etse mofapahloho oa meutloa, ba mo roesa ona hlohong bakeng sa moqhaka oa gauda. Ba mo tšoarisa lehlaka ka letsoho la hae le letona, bakeng sa lere la borena. Ba khumama ka mangole pel'a Hae, ba mo soma, ba re, Lumela Morena oa Ba-Jode. Ba mo tšoela ka mathe, ba nka lehlaka, ba 'mata ka lona hlohong. Ha ba qetile ho mo soma ba mo isa thakhisong.

Ba-Kreste ba bangata ba rapela likerekeng, ba etsa selallo, ba bina lithoko tsa Molimo, empa ka liketso tsa bona tse mpe ba boela ba thakhisa Morena oa bona hape. Hase bohle ba reng ho 'na Morena, Morena, ba tlang ho kena 'Musong oa Molimo, empa ho tla kena ba etsang thato ea Ntat'a bona ea Maholimong. Matt. 7:21-27. Bona le mokotlana oa Judase oa chelete setšoantšong sena. Judase o ile a eka Jesu, 'me a mo rekisa likotoana tsa silevera tse 30, hobane lerato la chelete le ne le mo fofalitse, 'me le khomaretse pelong ea hae, e khopo. Re bona lebone le mahlaahlela a neng a sebelisoa ke masole a neng a tlike ho tla tšoara Jesu bosiu. Masole a ne a sebelisa lotho ha ba laola likobo tsa hae, hore ho phethahale lentsoe la Molimo le profetiloeng: "Ba arolelana liaparo tsa ka, ba laola kobo ea ka." Pesaleme 22:18.

"E mong oa bahlabani a mo hlaba lehlakore ka lerumo, (la ea fihla pelong) eaba mali le metsi a phakisa a tsoa ho lona," Johanne 19:33-37. Pele mokoko o lla Petrose a latola Jesu pel'a

lekhabunyane, empa ka mor'a nakonyana a inyatsa ka meokho.

Na u paka Jesu ka lentsoe le ka liketso? Kapa na u tšaba ho etsa joalo na? Jesu a re: "Ea tla ntatola pel'a batho, le 'na ke tla mo latola pel'a Ntate ea maholimong." Matt. 10:32-33. Jesu a boela a re: "Ekare ha e mong a rata ho ntatela, a ke a itele, a ipelese sefapano sa hae ... a ntšale morao." Luka 7:23. "Ea sa nkeng sefapano sa hae, a ntatela, ha a ntšoanele." Mattheu 10:38.

Sefapanong ke boha Uena, 'Moloko oa ka;
Mali a tsoang maqebeng, le metsi
lehlakoreng,
Ka 'ona, ke re, ntlhatsoe, ke be motle,
ke loke.

5. TEMPELE YA MODIMO



Mona re bontšoa moetsalibe ea
hlatsoitsoeng eo bophelo ba hae bo

halalelitsoeng bo pholositsoeng ka mehauhelo e mangata ea Molimo. Molumeli enoa, joale e se e le tempele ea Molimo, moo ho lulang Molimo Ntate, le Mora, le Moea o Halalelang, Molimo o le mong. Ka ho ea kamoo setšoantšo sa Jesu Krete se leng kateng, "Ekare ha motho a nthata, o tla boloka mantsoe a ka, 'me Ntate o tla mo rata 'me ke tla tla ho eena, ke ahe ho eena." Johanne 14:22. Molimo o hlonepha, o hauhela, o phahamisa motho ka Jesu Krete.

Pelo ena joale e fetohile tempele eaz Molimo o phelang ruri. Sebe se lelekiloe. Bakeng sa liphoofole tse sa tšoaneng tse busoang ke Satane, nta'a leshano, re bona Moea o Halalelang ka pelong ena. Bakeng sa liketso tse manyala tsa nama pelo e fetohile, e se e tšoana le tšimo e beang litholoana, sefate se beang litholoana, se beang litholoana tsa Moea tse kang, lerato, thabo, khotso, boikokobetso, mamello, bonolo, molemo, botšepahi, khauho, boitšoaro, le tse ling tse monate ho Molimo le batho. Motho enoa joale ke lekala la 'nete la morara,

le beang litholoana, lekala (setho) la Jesu. Sefhiri sa hae sa ho bea litholoana ke hobane o lula ho Jesu Krete, le Jesu o lula ho eena. Johanne 15:1-10. Le hona o boloka lentsoe la hae ka pelong ea hae ka ho tla Moea, Kapa ka ho kolobetsoa ka Moea o Halalelang, o na le matla a ho hlola nama le litakatso tsa eona, a ho thakhisa le lithato tsa eona. Ka matla a Moea o Halalelang, o na le hona ho tsamaea ka Moea. Ha a sa phela ka tseo a li bonang, ka teso a li utloang, le ka tseo a li amang, empa o phela ka tumelo; hobane tumelo e leng ho Jesu Krete ka matla a hlohang lefatše. O phela ka tšepo, 'me o matlafatsoae tšepo e phelang ea ho khutla leholimong kapele ha Jesu Krete Morena oa rona. O phela leratong la Molimo le hlohang ka ho sa feleng.

Ho lehlohonolo ba pelo li hloekileng hobane ba tla bona Molimo. Matt. 5:8. Morena David, leha a ne a ruile haholo, a hlola lira tsa hae tse mo potileng ka hohle. Leha a se a bolaile Goliatha oa seqhobane le ba bang, leha ho le joalo o ne a ntse a ikutloela bohloki bo boholo ba hae,

boo a tsebileng hore e ka khona a be le seo a se hlokang ha e ba a rata no bona Molimo. A hoeletsa ka pelo ea hae eohle a re: "Oho Molimo, u bope ka hare ho 'na pelo e hloekileng." Pes. 51:10. Ha ho motho ea ka tsebang ho hloekisa pelo ea hae, ea ka ipopelang pelo e ncha ka hare ho eena, leha e le ho kenya moea o mocha ka hare ho eena ka matla ao e leng a hae. E ka khona a tle ho Molimo ka pako ea 'nete ea pelo, le ka boipolelo ba 'nete ba libe, le ka ho li furalla joaleka ha Morena Davida a ile a etsa, joaleka mora ea lehlasoa, ea ileng a furalla likolobe, a khutlela ho ntat'ae, a re ho eena, ka pelo e hlomohileng, le ka moea o robehileng: "Ntate ke sitetsoe Molimo le uena." Molimo o rata haholo ho thusa moetsalibe e mong le e mong ea tlang ho Oona ka moea oa pako, hobane ke Molimo o tšepisitseng oa re: "Ke tla le fa pelo e ncha, 'me ke kenye ka ho lona moea o mocha, ke tla tlosa ka ho lona nameng ea lona pelo ea lejoe, 'me ke tla kenya oa ka ka ho lona, ke le etse hore le tsamaee likomelong tsa ka.

Ena ke Testamente e ncha eo Molimo o e entseng, 'me oa e tlisa ka mali a Mora oa oona Jesu Kreste.

Setšoantšong sena re bona lengeloi hape. Mangeloi a laetsoe ke Molimo ho sebeletsa bao ba tlang ho rua bophelo bo sa feleng, 'me a larile pel'a ba tšabang Jehova. Pes. 34:7; 91:11; Dan. 6:22; Matt. 2:13, 18:10; Lik. 5:19, 12:7-10. Hape re bona Diabolose a hetlile ka morao, o rata kamehla ho khutlela pelong, moo a tsoileng teng, o emetse nako ea ho kena hape. Ka baka leo, re boleletsoe hore re falimehe, 'me re rapele hobane Diabolose, sera sa rona, o puruma joaleka tau, o ntse a lika-lika o batla eo a ka mo jang. 1 Pet. 5:8. Hanelang Diabolose, 'me o tla le balehela. Jakobo 4:7.

6. PELO E LEKILWENG E BILE E
AROHANTSWE



6

Mona re bona setšoantšo se soabisang sa mokoenehi, Leihlo le leng la hae le qala ho tutubala le bontšang hore tumelo ea hae e qala ho bata, o qala ho robala boroko, ba moea, bophelong ba hae ba bo-Kreste le ho se tšoane le ba bang. Leihlo le leng la hae le qamaka ka lihlong ka hohle, o leka ho rata lefatše, Leseli le ka pelong ea hae le qala ho fifala, 'me lipontšo tse ka pelong ea hae tse bontšang hore o rata ho utloa bohloko le Kreste li ntse li fokotseha 'me ha li sa eme ka ho otlooha joaleka pele. O se a le har'a meleko eo a seng a ntse a kena ho eona ka hanyane bakeng sa ho hanela Diabolose. O se a mamela lentsoe la moleki bakeng sa ho mamela lentsoe la Molimo. Leha ho le joalo o ntse a kena kereke, 'me o leka ho pata hore o se a khutletse lefatšeng, 'me pelo ea hae e se e tlohile ho Molimo, 'me e se e lahlile lerato la hae la pele ho Molimo. Naleli e ka pelong ea hae, eo e leng setšoantšo sa letsoalo la hae, e qala ho fifala, 'me sefapano se qala ho fetoha phahlo e boima ho eena. O qala ho hloka motsitsa

tumelong ea hae, o se a khaolitse ho buisana le Molimo ka thapelo. O qala ho ba bohlasoa bakeng sa pelo ea hae, 'me o se a neile moleki ea ntseng a pota-pota ka ntle ho pelo ea hae sebaka pelong ea hae.

Moea oa pikoko o batla moo o ka kenang le teng, ka pelong ea hae. O qala ho iphahamisa, mohlomong o iphahamisa joalo e le mo-Kreste, ea lebetseng hore o pholositsoe ka mohau feela. Botahoa bo kokota monyakong oa pelo ea hae, bo batla ho kena. Mohlomong e mong o mo leka hore a ke a noe joala hanyenyane, kapa o 'molella hore mahleu a lokile. Ha a lemohe hore ho noa joala hanyenyane kapa ho noa leting ho tšoana le noka e nyenyane e tlatsang noka e kholo ea botahoa. Kapa mohlomong mosali o etsetsa monna oa hae joala kapa metsoalle ea hae, ka ho ikemela ka hore eena ka bo-eena ha a noe joala, empa o hulela ba bang botahoeng, 'me o thetsitsoe ke moea oa botahoa. Bohlola le bofebe li tla ho leka mo-Kreste ka bohlale boo bohle ba lihele. Mohlomong o qala ho mamela lipuo

tse mepe kapa tse litšila o qala ho thabela metsoalle e mebe, 'me o se a thusa ho bina lipina tse mépe tsa likonsarete (concert) le ho tantša - ho hobela. Mohlomong e mong o 'molella hore tantši ea se-Kreste kapa tsela eo ea ho tantša monna a tšoarane le mosali e lokile, ho phoso ke hore ho tantšoe ka tsela ea bohetene. Ha a lemohe hore libaka tsa tantši ke libaka tseo bokhopo kapa liketso tse litšila li ngatafalang ho tsona, 'me batho ba ipitsang ba Kreste, tantši e etsoang ke monna le mosali e mpe ka ho fetisisa ho bona. Ba ipitsang ba-Kreste, ba re ntho e 'ngoe ke ho tsuba koae ka tsela ea se-Kreste, tsela eo ea ho tsuba sikarete e tse e le mpe joaleka tsela ea khale ea bohetene ka hobane ba tsuba ka ho fetisisa motšehare le bosiu. Jesu ha a ka a tsuba ka lebaka leo le mo-Kreste ea latelang Jesu a ke ke a tsuba.

E mobe o 'molella hore ho bapala le sebe ha se sebe, ho etsa sebe hang, kapa ho etsa ketso e mpe hang feela ha se kotsi, 'me sena ke seo a se bolelloang ke

moleki ho fihlela modemona o litšila oa boitsoaro bo bobo o fumana monyako oa ho kena ka pelong ea hae e hlatsoitsoeng 'me o iphumanela tulo teng hape.

Monna eo re 'monang setšoantšong sena, ea hlabang, o tsoantsa sa basomi le bahanyetsi ba bo-Kreste, ba hlabang pelo ka mantsoe a lonya. A ke ke e mamella mantsoe a basomi leha e le maraba a batho, haholo-holo ha tsena a li etsoa ke mo-Kreste. Mantsoe a bona a hlaba pelo ea hae, 'me ereka ha lerato la Molimo le se le bata ka pelong, o qala ho tšaba batho ho feta Molimo, ka baka la ho tšaba hore na batho ba tla reng kapa ba tla hopola eng, o fetoha lekhoba la batho oa koeneha.

Khalefo le bohale li hlaha hape nakong ea khanyetso le likhathatso, 'me li leka ho busa pelo. Ho rohakana, ho hlapaola li silafatsa melomo ea hae, eo a neng a rorisa Molimo ka eona, a rapela Molimo ka eona. Leha Diabolose a ka fumana manyako o monyenyanane feela, leha e le lesobanyana feela, noha ea mōna e tla

kena, 'me e atolose monyako hore libe tse ling li tsebe ho kena.

Ho bonolo ho lumella lerato la chelete hore le kene ka pelong ha eba re ke ke ra hlokomela likeletso tsa Morena oa rona Jesu, ea itseng: "Falimehang 'me le rapele hore le tle le se ke la kena melekong." Matt. 26:41. "Ka baka leo, ea lekanyang hore o sa eme, a ke a iponele hore a se ke a oa." 1 Ba-Kor. 10:12. "E ka khona re apare lihlomo tsohle tsa Molimo, hore re tle re hlāho lihlāho tsohle tsa Diabolose." Ba-Efese 6:11-18.

7. PELO E KWENEHANG



7

Setšoantšo sena se re bontša boemo ba pelo ea motho ea koenehileng, kamor'a ha a kile a bonesetsoa, ea lekileng neo ea leholimo, ea filoeng kabelo Moeeng o Halalelang, ea latsoitseng lentsoe le monate la Molimo, o oele. Setšoantšo sena se re bontša hape boemo ba motho ea sa kang a baka ho hang, leha a boleletsoe Evangelia e senoletsoe, a thatafatsa pelo ea hae a 'na a tsoela pele sebeng.

Jesu ka bo-eena o hlalosa ka mokoenehi, ha a re: "Ha moea o litšila a tsoile mothong, o ikela lithoteng tse cheleng ho batla phomolo teng, ha o e hlokile o re: "Ha nke ke boele ntlong eo ke tsoileng ho eona, a re ha o fihla teng, o e fumane e fietsoe, hape e hlophisitsoe. Joale o ee o late meea e meng e supileng, e o fetisang ka bolotsana, 'me e kene, e lule teng, 'me taba tsa motho eo tsa morao li fetise tsa pele ka ho lula hampe." Luka 11:24-27. "O hlahetsoe ke taba ea setšoantšo sa 'nete se reng: "Ntja e khutletse mahlatseng a eona, 'me kolobe, hobane e hlasuoe, e boetse e ipitikile seretseng." 2 Petorose 2:22.

Likhaolo tsena tse peli li hlalosa hantle haholo boemo ba pelo ea motho enoa. Sebe ka thetso ea sona se tlike ho lula le ho busa pelong ea hae. Le sefahleho sa hae se bontša boikemisetso ba pelo ea hae. Moea o Halalelang oa baleha, ka hobane Moea oa Molimo o ke ke oa lula le moea o litšila, pelo ea motho e ke ke ea e-ba tempele ea Molimo le lehaha la Diabolose. Lengeloj - lentsoe la Molimo - la tloha ka masoabi a maholo, le hetlike morao ka ho tšepa hore motho eo mohlomong o tla ikhopola joale ka ngoana ea lehlasoa. O ile a ikhopola a lutse har'a likolobe, a lakatsa ho khorisa mpa ea hae ka makhapetla e jeoang ke likolobe, ho se motho ea mo fang 'ona. A lemoha bokoenehi ba hae le boemo ba hae ba tahleho, a inyatsa, a re: "Ke tla tsoha, ke ee ho ntate, 'me ke tla re ho eena: Ntate ke sitetsoe leholimo le uena, ha ke sa tšoanela ho bitsoa mora oa hao." Ka baka la boinyatso ba hae ba 'nete, le ka baka la ho soabela sebe sa hae, ntate'ae a mo tšoarella, a mo hlabela namane e nontšitsoeng. A mo amohela.

Empa tabeng ena ha ho na moea oa boinyatso o mo thusang hore a khutlele ho Molimo, a itihela maotong a Jesu, a kope tšoarelo le tlhatsuo. Letsoalo la hae ha lea fetoha, le chesitsoe ka tšepe e khubelu ke mollo, 'me le shoele. O na le litsebe ho utloa empa o sitoa ho utloa memo ea Molimo, o na le mahlo ho bona, empa ha a bone sekoti se se nang phello sa lihele, seo a tlang ho oela ho sona kapele. Ha a sa hlajoa ke lihlong leha e le ho utloa bohloko ha a ntse a tsoela pele ho etsa libe pepeneneng. Satane o kene pelong ea hae, oa busa, o lutse joale ka morena teroneng ea pelo ea motho enoa. Mohlomong o ntse a ithorisa ka ponahalo e ntle ea bo kantle ba hae, athe o joaleka lebitla le koetlisisoeng, empa ka hare le tletse masapo a mofu le litšila tsa sebe. Matt. 23:27. Ntat'a mashano o nkile sebaka sa Moea oa 'nete pelong ea motho enoa.

Phoofolo e 'ngoe le e 'ngoe, le sebe se seng le se seng se na le modemona oa sona, le moea o litšila o thusa Satane ha a busa ka pelong ena. Motho enoa

leha a rata ho itokolla meeng ena e litšila e mo tšoenyang oa sitoa ho itokolla hobane e se e le lekhoba. O lemoha 'nete ea Molimo eo o e boletseng ka Moapostola Petrose, ha o re: "Ba neng ba nyelisa Molao oa Moshe ba ne ba bolaoa, ha le bona eo e leng ea hataketseng Mor'a Molimo ka maoto, ea entseng mali a selekane ao a hlatsoitsoeng ka 'ona ntho feela, ea nyefotseng moea oa mohau, eena ho tla lekanngoa hoba o tšoaneloa ke kotlo e fetisang hakaakang." Ba-Hebeberu 10:29-31; 2 Petrose 2:1-14.

Mobali ea ratehang, ha eba pelo ea hao e tšoana le ena, hoeletsa ho Molimo ka moea oa hao kaofela. O na le matla oa rata ho u pholosa, le ho u tšoarella, le ho u hlatsoa libe tsohle ha feela u e-tla ho oona ka Moea oa 'nete oa pako. O ka tlama Diabolose le makhotla ohle a hae, oa mo lahlela kantle ho pelo ea hao ha feela u o lumella ho etsa joalo. Tlo joale ka mo-lepera eane ea ileng a tla ho Jesu a re: "Ha u rata u na le matla a ho ntlafatsa." Jesu a re: "Kea rata, ntlafala." Mareka 1:40-43. Empa haeba u

tsoela pele ho thatafatsa pelo ea hao 'me u rata lefifi ho feta leseli ha ho sa le tšepo kapa thuso bakeng sa hao, hobane u khetha lefu ho e-na le bophelo, lefifi ho e-na le leseli.

Copyright ANGP

8. TSUO YA MOETSADIBE



Mona re fumana meotsalibe ea
ithatafalitseng, ea atametseng lefung, 'mele

oa hae o tletse mahlaba, moea oa hae o tšoeroe ke tšabo ea ho tšaba lefu. (Ramasapo-sapo) le tlile ka nako e sa lebelloang, e sa lakatseheng, le talimile mokuli ka sehlāho, ka mahlo a likoti. Menate ea libe e fetile, 'me botšabe ho le moputso o phahameng oa sebe o lokela ho lefuoa. Tšabo ea lefu e tšoare pelo le moea oa hae o tšohileng. Leha a batla ho rapela, o fihlela a le hole-hole le Molimo, ha a na kopano le oona. Mantsoe 'ohle a feela a matšelisano a tsoang ho metsoalle ea hae ea lefatše a sitoa ho mo thusa, maruo 'ohle ao a a bokeletseng ka baka la lerato la chelete a ke ke a pholosa moea oa hae, leha e le ho fokotsa bohloko ba lefu kapa a lelefatsa bophelo ba hae. Leha a leka ho nahana ka Molimo, Diabolose ha a mo fe nako. Tsohle tsa lefatše tseo a li ratileng, tseo a phetseng ka tsona eka lia mo soma, le balisa ba hae ba lefatše ha ba na matla a ho mo thusa. O qala ho lemoha hore ke ntho e tšabehang ho re a ka oela matsohong a Molimo o phelang. O tšepa hore a tla lokisa taba tsa hae le Molimo


ha a se a le liphateng tsa lefu, empa motsoalle oa ka e tla be e se e le morao kapa nako e se e sa u lumelle. Likete-kete tsa batho li shoele kapele-pele tsa hloka nako ea ho batla Molimo liphateng tsa tsona tsa lefu. Ka baka leo, re bolelloa hore re batle Molimo ha O sa fumanoa. Bakeng sa ho utloa mantsoe a Molimo a matšelisano, moetsalibe enoa ea shoang, ea ileng a furalla mohau oa Molimo le lerato la oona nakong ea bophelo ba hae, o se a loketse ho utloa moahloli, Morena eo a mo haneng, a reng, "Tloha ho 'na uena ea rohakiloeng, u ee mollong o sa feleng o lokiselitsoeng Diabolose le mangeloi a hae." Matt. 25:41. Ho laetsoe hoba batho bohle ba shoe hang, ho ntoo ba kahlolo, Ba-Heb. 9:27.

O u thuse uena ea balang bukanyana ena, hore u se ke ua lumela ho thetsoa ke menate ea libe tsa lefatše lena, kapa ua ithetsa ka ho re u tla kena bophelong, ka ntle le ho re u sokolohe. U furalle libe tsa hao. U tla ahloloa holim'a seo u se entseng nameng. Ea etsang ho sa lokang a 'ne a etse ho sa lokang. Moea o

itšilafatsang o 'ne o itšilafatse, ho cho
joalo buka ea Tšenolo qetellong eaa Bibeले.
Tšenolo 22:11.

Copyright ANGP

9. PELO E HLOLANG



Mona re bona setšoantšo sa mo-Kreste oa 'nete, ea mamellang, ea hlolang meleko e

tšabehang ea nama le Diabolose. O lekiloe ka nga tsohle empa a tiisetsa ho isa qetellong. Ke ea hlālang ka ho fetisa ka Jesu Kreste, ha a simolla peiso ea bo-Kreste feela, empa oa titima 'me o geta leeto, a ntse a talimile Jesu, moqali le mophethe oa tumelo ea rona. Ba-Heberu 13:1-2.

Satane le mkahotla ohle a hae, ba potile pelo e lumelang ba leka ho fumana moo a ka kenang le teng, empa o sitoa ho kena, boikhohomoso, lerato la chelete, moea oa ho itšilafatsa ea kokota. Sebakeng sa ntja le nkoe re bona phooko le esele. Hangata sebe se iponahatsa ka litšobotsi tse sa tšoaneng, le mabitso a sa tšoaneng. Mo-Kreste ea falimehileng o lemoha sebopelo se seng le se seng sa sebe, leha se ka tla ka sebopelo saporapeli, kapa sa tla se le joale ka lengeloi la leseli; hobane lentsoe la Molimo le moea oa 'nete o ka pelong ea hae, o mo tsamaisa 'neteng eohle, o mo thusa ho khetha bobele ho botle. Kantle ho liphoofole tsena le bademona ba tsona, ba li felehelitseng, re bona motho ea hobelang ea tantšang a

tšoare mohope oa joala kapa veine ka letsoho la lae, ea lekang moKreste enoa ka menyaka ea lefatše le ka seno se tahang, le ka tantši. Empa tsena tsohle ha li mo etse letho mo-Kreste enoa hobane ke ea shoeleng ka 'nga ea sebe le ka 'nga ea lefatše.

Meleko ena eohle e mo atametsa feela pel'a Molimo. Monna e mong o mo hlaba ka thipa e leng ka lipuo tse mpe, ka ho seba, ka ho mo soma, o utloisoa bohloko ke ba sa lumelang, le ke ba-Kreste ba bohata. Ba hlaba pelo ena. Empa o itšelisa ka mantsoe a Jesu, a reng: "Le tla ba lehlohonolo, ha ba le hlapaola ka baka la ka, ba le hlorisa, ba le bea bobele bohle ka bohata. Thabang le hlasimolohe ka ho nyakalla, hobane moputso oa lona o tla ba moholo leholimong." Mattheu 5:11-12.

Sebe, le nama, e leng bo-eena le Diabolose li leka ka hohle ho arohanya mo-Kreste enoa le lerato la Molimo. Empa, ka tšepo o re: "Ke mang ea tla re

arohanya le lerato la Krete na? Na a ke botubo, kapa tsietsi, kapa hloriso, kapa tlala, kapa bofuma, kapa timelo, kapa lerumo. Che! Empa nthong tseo tsohle, re hlāla ka ho fetisisa ke ea re ratileng.” Ba-Roma 8:35-39.

Kahobane a apere lihlomo tsohle tsa Molimo o tseba ho ema a tiile ka tsatsi le lebe, 'me ka matla a Moea o Halalelang o hlāla le meleko eohle. O lemoha hore Krete ea phelang ka pelong ea hae o matla ho feta Diabolose le makhotla a hae, hobane ea leng ho rona o matla ho feta ea leng lefatšeng, e leng Diabolose. Jesu o hlotse Diabolose, le sebe le lefu, 'me ka eena re ba hlālang ka ho fetisisa, 'me re na le matla a ho hlola le ho hapa moqhaka oa khanya.

Naleli e tšoantša letsoalo la hae e hloekile, ea khanya. Pelo ea hae e tletse tumelo le Moea o Halalelang. Lengeloi la Molimo le ka holimo ho eena le mo hopotsa lipallo tsa bohlokoa tse baletsoeng ba hlolang, ba tiisetsang ho isa qetellong. Tšenolo 2:7,11,17,26; 3:5,13,21.

Mokotlana o bulehileng oa chelete o bontša hore ha se pelo ea hae feela e bulehileng, empa chelete ea hae le tsohle tseo a nang le tsona o li neetse Molimo. Bakeng sa ho senyetsa chelete ea hae menyakeng ea lefatše o thusa mafutsana. O nea Molimo boshome ba seo a se fumanang, ka thoko ho thusa moo a ka thusang teng ka lerato. Ho tsohle o sebelisetsa chelete ea hae tlotlisong ea Molimo, joale ka nku e fanang ka boea ba eona ho mong'a eona. Senkhoha sa bohobe le hlapi li bontša hore o phela bophelo bo hloekileng ba boitšoaro bo botle, ha a etse joala le veine hore e be lijo tsa hae, leha e le ho itšilafatsa ka ho ja mali le nama ea liphoofole tse ichoeletseng. Ha a tsube koae ka tsela efe kapa efe, hobane a hopola hore e ka khona 'mele oa hae o hloeke ka hobane e le tempele ea Molimo. Pelo ea hae e fetohile ntlo ea thapelo, o tsamaea litšebeletso tsa kereke ka mehla ka hlomphe leha ho le joang kapa joang. O rata ho rapela leha e le ka tlung ea thapelo, kapa ka tlung eo e leng ea hae.

Ka mehla o bokella ba ntlo ea hae hammoho ka botšepahi ho tla rapela, hobane a tseba hore mo-Kreste o sitoa ho phela ka ntle ho thapelo. Buka e phetliloeng e bontša hore Bibeletse - lentsoe la Molimo, ke buka eo a e phetletsoeng hore a e bale a ithute eona ka cheseho, ke lebone la maoto a hae, ke sabole ea ho hlāla Diabolose, ke bohobe ba ka mehla ba moea boo a bo jang, bo fepang moea oa hae e bile ke metsi a timang lenyora la moea. O sebelisa lentsoe la Molimo joale ka metsi a ho itlhatsoa, le joake ka seipone sa pelo ea hae, seo a iponang kamoo a leng kateng.

O rata ho jara sefapano se mo hopotsang hore o thakhisitsoe le Kreste 'me o tsohetse bophelo bo bocha, 'me ka baka leo o batla lintho tse holimo, lintho tse sa feleng, lintho tse sa bonoeng. O itokiselitse ho khahlana le Molimo. 'Me o joake ka sefate se hlomiloeng pel'a metsi, se beang litholoana ka khoeli ea sona, se joale ka lekala la 'nete la morara. Lerato le phethenileng la Molimo le tletse ka pelong ea hae, ka baka leo ha a tšabe

ho shoa. Pes. 1:1-3; Johanne 15:1-14; 1
Johanne 4:18-21.

Copyright ANGP

10. HO KENA PHOMOLONG E SA
FELENG



10

Jesu o itse: "Ke 'na tsoho le bophelo, ea lumelang ho 'na leha a shoele o tla phela. E mong le e mong ea phelang, 'me a lumetse ho 'na, a ke ke a shoa le ka mohla o le mong." Johanne 11:25-26. "Ea utloang lentsoe la ka, 'me a lumela ea nthomileng o na le bophelo bo sa feleng, ha a ka ke a tla kahlolong, empa o tlohile lefung ho kena bophelong." Johanne 5:24. Mo-Kreste oa 'nete ha a tšabe matšoenyeho kapa tlhokofatso tsa lefu, le lona ha a le tšabe, hobane lefu le metsitsoe ke hlolo. Lefu, tsenene ea hao e kae na? Uena lebitla, ho hlāla ha hao ho kae na? A re leboheng Molimo o re neileng ho hlāla ka Morena oa rona, Jesu Kreste.

Motho ea phelelang Molimo ha a tšabe ho shoa, ha nako ea hae ea ho shoa e mo fihlela, o tla ea ka thabo lehaeng la hae le phethehileng, le sa feleng. Moapostola Pauluse o re: "Ke na le takatso ea ho tloha le ho ba le Kreste, hobane ke hona ho molemo ka ho fetisisa. Ba-Fil. 1:23. Mo-Kreste o lakatsa ho bona sefahleho sa Jesu ea mo shoetseng

sefapanong, ea mo lopolotseng ka mali ao e leng a Hae. Moea o Halalelang o mo hopotsa mantsoe a Jesu, moo a reng: "Lipelo tsa lona li se ferekane, lumelang ho Molimo, le ho 'na le lumele. Meaho e mengata ka tlung ea Ntate. Ke tla boela ke boee, ke le nkele ho 'na hore moo ke leng teng le lona le be teng." Johanne 14:1-14. Taba tseo Molimo O li lokiselitseng ba o ratang, ke tseo leihlo le sa kang la li bona, tseo tsebe e sa kang ea li utloa, tse sa kang tsa itlhahela pelong ea motho. Ha ho puo lefatšeng e ka hlalolang ka ho lekaneng khanya ea leholimo, e lokiselitsoeng ba tlang ho hlola mona lefatšeng, e leng ba lumetseng ho Morena Jesu Krete.

Setšoantšong sena sa leshome re hopotsoa ho ea hae ha molumeli oa 'nete ea lumetseng ho Krete. Bakeng sa lefu, Ramasapo-sapo ea tšabehang ho bonoa lengeloi la Molimo. Le emetse ho nkela ho Molimo moea o beiloeng o lokileng. Moea o tsoile litlamong tsa 'mele oona o shoang, o nyolohela sefubeng sa ea ratileng moea ona. Ea mo pheletseng, eo a phetseng ka

eena, a ba a mo shoela lefatšeng. Kamohelo ea thabo e mo emetse ho Molimo, moo Morena oa hae a tla re ho eena, "Ke hantle, mohlanka ea molemo, ea khabane; kena thabong ea Morena oa hao." Matt. 25:21. Satane ha a sa na matla holim'a hae, kahobane, "ho leng thata mahlong a Jehova, ke lefu la bakhethehi ba hae." Pes. 116:15. "Eaba ke utloa lentsoe le tsoang leholimong, le re ho 'na ..." Ho lehlohonolo bafu ba shoelang Moreneng ho tloha joale'. Moea o re: "E, hobane ba ea phomola mesebetsing ea bona; hobane mesebetsi ea bona ea ba letela." Ts'enolo 14:13.

Mobali ea ratehang oa buka ena, Molimo o u thuse ho neelana ka pelo ea hao ho Jesu, hobane o re: "Mora oa ka, morali oa ka, mphe pelo ea hao. O tla u fa pelo e ncha, o kenye moea o mocha ka hare ho uena. U se ke ua lumella pelo ea hao e thetsang hore e u khelohise ka hore u latele litakatso tsa eona tse mpe. "Ea itšepelang pelo ea hae ke lehlanya." Liprov. 28:26. "Empa ea tsamaeang bohlaeng o tla pholoha." Furalla libe tsa

hao, 'me u khomarele ho loka, hobane moputso oa sebe ke lefu, empa neo ea mohau oa Molimo ke bophelo bo sa feleng ka Jesu Krete.

Uena eo u neelaneng ka bophelo ba hao ho Molimo, itšoarelle ka matla mantsoeng ana a bophelo, ka tumelo le ka lerato le leng ho Jesu Krete, hobane u tseba eo u mo lumetseng. U re: Ke kholoa ruri hore o na le matla a ho mpelokela seo ke se beileng ho eena, letsatsi lela le be le chabe. Ikahe tumelong e halalelang ka ho fetisa, rapela ka Moea o Halalelang, u ipoloke leratong la Molimo, u ntse u talimile Jesu, moqali le mophethi oa tumelo ea rona, e leng Morena oa marena ea tlang kapele.

Joale ho ea ka tsebang ho le boloka, hore le se ke la oa, le ho le hlahisa pontšeng ea hae e khanyang, le se na letheba, le nyakaletse, ho Molimo o 'notši , 'Moloki oa rona, e be khanya, le boholo, le matla, le borena, joale le ka mehleng le mehla!

Amen!

1. **Motse oo re o hlolohetsoeng**
Re se re o bona pejana;
Leha maranyan'a sa le
teng, O se hlahile oa
khanya.
Monateng, kapele, Re
se re tla kopana
bohle.

2. **Ntate O re lebeletse teng,**
Re lokiselitsoe litulo,
Ana re tla finyella
neneng, Monyakeng ola
oa lerato? Monateng,
kapele, Re se re tla
kopana bohle.

3. **Se soabeng! Re tsoheng Molota,Leha**
r'e-shoa ke sekoboto!
Bonang, ha ho sa le sebaka,
Ra habeng, e s'e le phomolo.
Monateng, kapele, Re
se re tla kopana
bohle.

4. Ha re atamela haufi,
Re se re hloloa ke nyakallo;
Re ea u opela mahofi,
Motse o motle oa Molimo.
Monateng, kapele,
Re se re tla kopana bohle.

Copyright ANGP

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, tablettes, etc. de www.angp-hb.co.za ou comme une Application "Heart of Man" sur téléphones Android.

Este livro "O Coracao do Homem" é obtido em mais de 538 linguas e dialectos falados em todo o mundo, a saber: (Africa, Asia, America do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de www.angp-hb.co.za ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, à l'école du dimanche ou lors de réunions de plein air. Soyez aimable de nous contacter pour assurer les derniers prix en cours du tableau.

As 10 imagens do coração, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coração podem ser obtidos com características Europeias e Africanas e podem ser usados em conjunção com o mesmo livro em classes de ensino bíblico, evangelização ou ao ar livre. Agradecemos que nos contacte-se para confirmação do último preço dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre littérature, nous informant de la langue dans laquelle vous pouvez traduire cette littérature évangélique. Votre aide sera beaucoup appréciée.

Si vous avez trouvé le salut en Christ ou si vous avez été béni par notre littérature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traduções de nossa literatura em outras línguas. Vossa assistência será muito apreciável.

Se tem encontrado a salvação em Cristo, ou se tem sido abençoado por intermédio da nossa literatura evangélica, faça o favor de nos informar. Pois nos gostaríamos de agradecer a Deus juntamente convosco, e lembrá-lo sempre em nossas orações.

For free Gospel literature, books and tracts in over 538 languages, write to:

Pour obtenir gratuitement de la littérature evangelique, des livres et des traites en plus de 538 langues, ecrivez a:

Para obter gratuftamente a literatura evangelica, livros e folhetos em mais de 538 lnguas diferentes escreva para:

www.angp-hb.co.za

info@angp.co.za

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

A Gospel Literature Mission financed by donations

Une Mission de littérature evangelique financee de dons

Missao de literatura Evangelica financiada por donativos

(Reg. No. 1961/001798/08)

The “HEART OF MAN” books can be viewed and downloaded using the following link:

www.angp-hb.co.za